

# ALL NATIONS GOSPEL PUBLISHERS



[www.angp-hb.co.za](http://www.angp-hb.co.za)



[info@angp.co.za](mailto:info@angp.co.za)

*BAMILEKE HEART BOOK*

**NTÙ MÈNTÙN  
KE  
YENTESE YWÈLE NTÙM NTÙ LO**

**SEVE 10 NKE NTSJOB NU NTÙM  
TÀNKÙT**

Copyright ANGP

**COPYRIGHT**

**ISBN 0 - 947052 - 03 - 8**

**E-MAIL: [info@angp.co.za](mailto:info@angp.co.za)**

**ALL NATIONS GOSPEL PUBLISHERS**

**P.O. Box 2191, PRETORIA, 0001, R.S.A.**

**(A Gospel Literature Mission financed by donations)**

**(Reg. No. 1961/001798/08)**

**NTÙ MÈNNTÙN PÀ NDÀ-NSI KE  
DÙ' FÀ' SATAN NO  
(1 Yohané 3:4-10)**

Yen nwà'ni li ke' pà ze nswe. A yà tshùà ngu'njù 200 (nkù bàà) mb'a bwôgmbwe ntum à France là. Mbe' yàm penntùn tshùate njam bwe nkwé mbotni Nsi. A pà yentese ywèle ze penntùn yen mat yôg sub ntùm ywèle, mum bwe là, ndańdań mbà ze tu wut Nsi pe njen nà. Penntùn tse po tshùà njam.yen me ñwà'ni li ndèn mbe nukebwô yàm ntùm ko' ntù tshob là ghà'mbu; po kań ntù tshobe, mbèn nkwé ntù nswe mbà ywèt nswe.

Bin à' pe siań yen ñwà'ni li nke nkwihte mb'a pà tà' yentese ze mbà pin ku'ni ne yen tu wut tsin mum bwe là, ke pin pe ghakelèn Nsi lo, ke penkristô lo, ke pen tse po ke' ghù pamntù lo, ke pen tse po kag pamntù yub nsi lo, mbà pin à' yen tu wut tsin ntùm bwe ndańdań mbà Nsi num njen nà. Nsi ke' pe tôte tse sàm mèn. A ke njen à ntù mènntùn. (1 Sam. 16:7).

Satan pà Tà tatte, mbèn mbe mfen njù njame mbà nsi yen njù li. A num ndo' wul i mbà angèl nkà' là, là a ke pe a angèl nkà' mbà mbe' yàm penntùn num nke' nkwate mbèn nke nkô ne lo' ndo' i yi là. Tshen pen ni pe ntshàm ndüse po lo' seve satan ndańdań mb'a lo' mbe yi là. Mbe' yàm gphantum Kristô tse tatte num bwe sènni, ndańdań mb'a nà' mbe tà fe mbwe là. Yen ni ke pà nu netshàme nummbe satan num ndo' wul i mbà angèl nkà' là (2 Pàkôrintô 11:13,14). Satan z'a pe nsi sen lańnjù li là pe mà' fù num myag penntùn mbà num zenu sube ndù kà po yen nkà' ze nkùn mebwo nkuni Kristô num nké' là ... (2 Pàkôrintô 4:4) njôn penkebwô fa mbà njôn ghasagntù fa kwù à mfumiag mbwe Nsi njam ngüninu yen njù li, mbà njam mfen z'a ghù pawà num mfùàg, ywèt ts'a tshwèt mfà' ndônni num pon tatu là" (Pàéfésô 2:1,2). Ntag ndulàlà mbà myag mub ghà' num yub nebi, nummbe po tshwèt nèn ndańdań à num vùkob. Mèn z'a tshob ndù sàm nukebwô ke num i là, tatt'a tu

wul i.

Pin à' pe siañ yen ñwà'ni li, mbèn mbe dyag ntun num pàseve ts'a pe ntùm bwe là, nku'ni ne yen ko' ntù tsine mum bwe. Kà pin tshètte mbe ñwà'ni Nsi là'te zin ko' mat ntù tsine! Pin pam nukebwô tsine, kà pin gha mbe pin ke' pe ghù nukebwô nummbe Ntshob Nsi pe ntshob ndù: "A pe ze pag à pin tshob ndù nukebwô ke num pen nà, mbà pag à pin tatt'à tu wut pen, mbà nu nenùn ke num pen. A pe ze pag à pin pam nukebwô pen nà, mb'a pà mèn nenùne, mbà mèn netsine, mb'a nsi lagte nukebwô pen, lànte pen num njôn nu ketsin fa. A pe ze pag à pin tshob ndù pe ke' ghù nukebwô là, mbà pag à pin lo' i ngù ngatatte yi, ntshob mi ke pe num pen." (1 Yohané 1:8-10). "Lem Yésu-Kristô, Mèn Nsi, num ndànte pen num njôn nukebwô fa." (1 Yohané 1:7). Ke pin à' ju'ntshu Satan no, ke pin à' ju' ntshu Nsi lo; mbà pin nsi pe a pàkwàn nukebwô ke ghafà' Nsi lo. A pe ze nukebwô pèn nke ntshagte zin nà, kà pin gha; pin kwà' à Nsi z'a ku'ni ne ghù pin tù' zin tu njam Yésu Kristô z'a nà' nse' ntùm yen njù li num ne yôg penkebwô, mbyagte neta ze Satan num nke ntô pen yi njam nukebwô là. A pà ngatshu' pen. Pin pà mbwe Nsi Nelàn z'a pe njen njôn tsham fa, mbà njôn nkwatenu fa, mbà njôn ngùninu fa ts'a lemte ntùm yôg sin nà. Pin ke' ku'ni ne lemte mbwe Nsi, ke ne ndemte ngùninu min yi, nummbe mèn z'a nàpte tòn mèn nà ke' pe ju' nu ké? Mèn z'a nàpte lag là ke' pe yen nze ké?

"Nummbe Yawé pe mà' myag mi num njôn nsitshà' fa num ne tomte pen tse po yàb njôn ngô ntù yub fa num i là." (2 Krônika 16:9). "Nummbe Nsi num njen ngùninu njôn penntùn fa. Mbà we lo num mbe tsho' kungsi a yen. Sàm dù' nesènte ke netshañ njame no ke tse bwe, dù' ze pe ghaghù nukebwô lemte bwe là." (Yob 34:21,22).

Là Yésu ke fà wul i num po, nummbe a lo lèn njôn yub fa. A lo ke kô ndù mèn kwé nta mènntùn, nummbe tu wul i lo lèn

ju z'a pe ntùm ntù mènntùn nà. (Yohané 2:24-25).

Ndùlàlà “Mènfen pà mèn ze po lagte mfànnu mi, ndagte nukebwò i là. Mènfen pà mèn ze Yawé ke' pe siañte mfànnu mi, ze sàm fùte ke' pe ntùm ntù i là.” (Yobkwi 32:1,2). Pin siañ Yobkwi 51. Yésu tshwèt mbèn nke ntsiañ pen sènni nke ntshob ndù: “Pin se' me njòñ zin fa tse piñ pole, mbèn nket lèt là, tu wul àm m'à' fà fite pin.” (Matio 11:28-30).

J.R. Gschwend

## **Mbagte Ntun Pàseve: Mbwe Seve**

Sen seve li tshwèt ndà'te ntù mènzwì, ke ntù màndum no, z'a ke' kañ ntù i là, ze ñwà'ni Nsi pe ntsiañ ndù mènkebwò là; a pe a ghagha mbèn nke njòg ghag à ngùà, Ywèt yen njù li po ntshàmntù mbà ghe'te mbàb wut pèn nke ntshagt'é. Yen ni pà seve ntù mènntùn kwà' mbà Nsi num njen i ntùm nenùn nà. Myag meba po ntshà'myag num nke ntshob nu mfà num nebumndu' ndañndañ mbà ñwà'ni Tànkùt 23:29-33 num ntshob là: “Netshob mbe wé' ke ndòt'a pà we? netshob mbe ha! ke ndòt'a pà we? Ntanta po nebote mèn ke ndòt'a pà we? ne ket mfañ ke ntun mi ke ndòt'a pà we? Myag meba ke ndòt'a pà we? A ke ndòt'a pen tse po num nso wut num ndu', nke nèn nu ntamte ndu' là. Kà kañte mbwò ndu' meba mi a ntùm ntù' nke mbùn nà, a ke nswe' à ndà'ndà'. Là mbe myagte nke ntshòg ntshùà nyu, nke ntshòg ntshùà swenyu. Myag mo nsi yen nu nezwiañte, ntù o tshob nu z'a ke' zin nà.”

Tun tu sen seve li, pin tshwèt njen ntù mènntùn ndù nyàm nzenze tswe ntùm bwe nke ndà't'à nukebwò yàme z'a num ngù là, ntù mènntùn pà dù'ntswe mfànnu mage mbà diañ nukebwò tshage. Nsi lo tshùate njam ngamnde' Yérémia ntshob ndù: “Ntù



1. NTÙ MÈNKEBWÒ

mènnùn sèn num njôn pag tse fa mbèn ntshùage. We z'a lèn ndùl'à?" (Yérémia 17:9). Yésu lo sañlañ num yen nu li ntshob ndù: "Nummbe nkwate nukebwô ke mfe à ntùm ntù penntùn: ne kale, tshô, nezwi mèn, ne ghù màndà, ze'te, netshùage, fùte, ne kô yôg ngùà, myag ghe'te, tshàpte, ko'te wut, zwiañte. Njôn tshen nukebwô là fa ke ntum à ntùm ntù mèn, kà nsagte mèn." (Marko 7:21-23).

**1. NGATU** — Mbà we lo num nyàmte ngatu num mb'a bwô là; a pe ntùm ntù mènntùn nsenni nke ndà't'a nukebwô ko'tewut. Lucifer z'a nà' mb'a kèrubim ngakabte là, nà' mb'a nket-nkà' Nsi, fe neto'te mbe tà' angèl Nsi. A lo vù nsi a njam ko'tewut kà nkañ nzi ngakebàn Nsi: ndùl'à mbe Satan (Esaya 14:9-17; Ezekiel 28:12-17).

Ko'tewut fe à Satan. A num mbèn nke ntswite wul i ntùm mat nzenze: tsemo' penntùn pe nko'tewut num nkàb ze po ghù là, num ñwà'ni po zi'te là, num ndènnu mube, mbà num mbwômbwô nzwe po pe mà' nke ndo' ndà'te njôn nkam wut mub fa yi kà tuswe ke ko yube. Tsemo' pe nkùntù ne ket tsho'ntùn ne ziage, mbà pàmbwô mbà nkwa poa mbà'ntôn ... nda'ndañ mbà po tshob ntùm nwà'ni (Esaya 3:17-24) là. Tsemo' pèn nke ntshùà njam pàtà tshob tse ndùb, num ngô yub ke tumlà' yub lo, num mub ntengô, num sa ndyag ndù po ghamte yube, nke ndagte ndù: "Nsi pe ntshètte ghako'tewut, là, à num mfà kondèn ghafàwut Nsi." (1 Pétrô 5:5). Nsi pe mbàn ko'tewut mbà tà'nsône. "Kà'te po ko'tewut pà mànze nukebwô. Ntshukebwô pà ju ze me num mbàn neshu là." (Tànkùt 8:13). Ne vù nsi ke nzin à njam ko'tewut, ne tiag fe njam kà'te." (Tànkùt 16:18).

**2. FOTMBWE** — A pà tà' nyàm nke ndame mbèn nke ntshàmntù. A pe nsenni nke ndà't'a ghe'te mbàb wut, yôg kebwô, kat, màndà. Tshen nukebwô li ghà'mbu ntùm njù sènni z'a pe myagte ngelañ nà; a yàm k'à nke ndyag mbe pag à pin siañte njen mbe Yésu nà' ntshob à nenùne ndùs'a nà' ntshob mbe



pà myagte ngelañ nsi pe à mbà Sodòm po Gomora là, A ndõnni ngu'njù 2 000 (ntshà' bàà) mb'a tshob yen nu li là.

A ke ndà' pàndum poa pènzwi pèn ntshùb yen mat kebwò li z'a tsho mbà ntùm tunndà penntùn tshen nà tse po pe ghafà' Nsi là, a tsho ntùm pàdù'fà, ntùm pàdù'nwà'ni mbà netèt ghazi'te ñwà'ni. Po nà' ndo' à pe zenu po mat Satan njwit yen nzwit tshu'tu kebwò li mum ntù penntùn, ntshùat'a njam diañyen, diañsa, ñwà'ni kebwò poa tsemo' nzenze mánze wà, kà tuswe ke ne nko sàm mèn. Ndùlálà ju ze Nsi pe ntsian ndù nukebwò là nke ntù' pe a ju mebwò sènni. Mbe' yàm pònke' nke ntù' lo' mfi' à ntùm roman tse po pe nsiañ nà, mbà ntùm ndiañyen po pe njen nà; a num mbe myagte tuswe ko yube, po pèn mféme. Ghaghù nkañngo tse pàndum, mbà tse pènzwi tse yòg sub pe à pe mat kebwò mbà màndà là, ke ntù' pà sà'nde' num myag yen zwiañ pònke' li. Pàdù'sa ke mbèn mb'a pàdù' ntàg kebwò po màndà. Po ke' pèn mbe lo' mfi' a num pàsà'nde' yòg nelàne tse ñwà'ni Nsi pe ntswite là. (Yosef: Neto'te 39 poa tsemo'o) Mbà njwèn Zezulu, z'a pe ngakelèn Nsi, ke pe me'te ne zwi màndum ke mènzwì lo z'a ghù màndà là, ku'ni ne fà ntàg mi pen ntengò mbèn mbote pen ntùm lé'njù tsho'tentsha. Nsi ke' tshob pen ndù pe ghù sa po kat, là ndù pe ke mbémt'é. “Pin ke' lèn ndù mèn z'a tamte po kattù mènzwì là, pà wut ntshù' po yi ké? Nummbe po tshob ndù: pen pàa nsi tù' à mbàb wut ntshù'. Là mèn z'a tamte po Tshùaben nà pà tà' ywèt ntshù' po yi. Pin kù kat! Njòñ nukebwò fa tse pe mèn ghù là ke' pe tsho num wul i; là, mèn z'a num nkat là ke ngu nukebwò à num ko' tu wul i. Pin ke' lèn ndù wut tsin pà ndà ywèt Nelàn ts'a pe num pin, ndù pin kwé à Nsi là ké? Tu wut tsin ke pèn ngu wut tsine! (1 Pàkòrintò 6:18,19). A pe ze mèn baggte ndà-Nsi là, mbà Nsi nsi baggt'é; nummbe Ndà Nsi pà nelàne, pin pà yen ndà-Nsi là.” (1 Pàkòrintò 3:17).

**3. NGÜNYÀM** — ke ndà't'à nukebwò nebumndu' mbà ne jù yàme. A pà tà' nyàm ndù a sagte, nke mfèt njòñ tshu fa ts'a



fon num mànz'é là, k'a bwò, k'a sagte lo. Tshù mbà ntù mènkebwò z'a pe nkù'ntòh num njòh nu fa, num njòh ntshob fa, num njòh ñwà'ni ne siañ fa, mbà num njòh yenve kebwò fa, lo' mbe yi là. Jujù kebwò, ngùninu kebwò mbà ne ke nu sikà, ke ne fit ndepà' lo, mbà nzwit ne ke nu bàngà poa tsemo' pagkèt tsheb pe nsagte wut mènntùn nyañtu ze po nà' mbom i à ndù a pe tempèl Nsi z'a pe ntùn nà. Mat ne ke nu ndepà' lo' ntù pàndum poa pènzwi sènni ntshùa njòh ngelañ fa.

Ndà' neta Nsi pèn nku'ni ne kwé lèn tshen kwàn ndepà' mbà kwàn Satan ni. Ghabam Nsi num mbe ke nu sikà ntùm tà' ndà-Nsi; num mb'a pe a tà' pagkèt nu num myag mub là, ke pe ko tuswe ne sagte kwà' ko' wut tshobe, z'a pà kwà' ko' ndà-Nsi là, "Pin ke' lèn ndù pin pà ndà-Nsi, mbà ndù ywèt Nsi num ntswe num pin ké? A pe ze mèn baggte ndà Nsi là, mbà Nsi nsi baggt'é." (1 Pàkòrintò 3:16,17; 6:18,19; 2 Pàkòrintò 6:16; 1 Pétrò 2:5; Pàròmà 12:1,2).

Tà' mènntùn z'a pe ntshàmntù là pèn mb'a pagkèt mèn mbwe Nsi. Pag à pin ke njù ju à ne lo' njòg yi, pag à pin ke ke njòg à num ne jù ju. Nganziku'u ku'ni ne ywèt ndùs'a jù jujù ntùn nà, là ngatshàmntù ke ndù i ke ntshob à pe ndù: fà li! fà li! pèn mfà! pèn mfà!

Ntù ngaghe'te ju ke' pe tsewe', a ke pèn njwèle. Fitnu njwèn kàn, po nà' pe ndù po à tamte ngatshàmntù mbà ngabumndu' ndòn, a kwù. "A pe ze tà' mènntùn ghù nshum i z'a pe ntatu mbèn nke ntshege, ke pe ju'ntshu Tàab po màab, ke pèn nke nju'ni po mbà ndùse po lab i là. Tàab po màab nsi lo' i nèn yi mbwe ghakwémbwe ntùm se túsò, pèn tsin nzendà túsò di' z'a pe ntswe là. Po nsi tshob ghakwémbwe se túsò ndù: tshù mèn yag li, a pe ntshege mbèn ntatu ke pèn nke nju'ntshu yage, nke ntshàmntù mbèn nke mbumndu'. Njòh penntùn fa mum se túsò nsi tamt'é ndòh, a kwù. Ndùlàlà, o nsi tsho' nukebwò netèt pin, ndù njòh pà Israèl fa ju'u mbèn mbwòge. (Nebwògte 21:18-

21). “Nummbe nganu ndu’ po ngajù ke ywètz pe ntsho ntùm bwôn, ngazi myaglo nke nkel à ghanzwe.” (Tànkùt 23:21). Mèn z’a pe njôg shun poa pen po ghù yôg kebwô là pe nkag tuswe tu tàab ... (Tànkùt 28:7). Kwimte tshô ngankàb mbà Lazaro. Ngankàb nà’ mb’a tà’ ngatshàmntù mbèn mb’a kwàn tse ghe’te. A lo kwù nèn ngô fepenntùn ntsho bwe nke njen nge’ neshu, ntswe bwe mbù’ myag mi mfe tù njen Abraham ngùanesa mbà Lazaro num ndàntù i (Lukas 16:19-25). Pag à pin ke’ ku’ni ne sôn njôn nge’ ze nebumndu’ pe njàb là. A yàm mbà pe sàm mèn ke lo’ ngù ngùà yi là. Nsi num ntshob kwà’ mebwô ntùm ñwà’ni i ndù sàm ngabumndu’ ke nsi tsho ntùm nufen kamànyam. Pen tse po pe na neta ndu’ là, vù ntsha nda’nda’ mbà pen tse po pe nswèn nà nummbe Nsi tshob ndù: “Nge’ tu pen tse po pe njàb yub net’a num nenundu’ yi là; ze yub ndù’ p’a ndà’ neke ntamte neta ndu’ pam po là.” (Esaya 5:22). “Nge’ tu mèn z’a pe ngù mfèl i nu ndu’, là — mbà wù z’o pe ntshwètte ntù’ o yi, ngù a bum ndu’, ndù o yen i tunntôg là. W’à’ ghù njwèt tuswe, ke pà ghamte. A bwô mbà wù yu nu, mbe tunntôg, ntswite wul o, nummbe ntù Yawé z’a num pu i ze zwim nà kañ nke ndôt’a wù, tuswe nsi kabte ghamt’o.” (Habakuk 2:15,16). “Po pe nkô lôñe, lôñ nsce’ lammbé, medub po ndu’ ndùse po tshwèt njù jùà là. Là mbe se’ mbà fà’ Yawé là, po ke lo’ mbà ju là, ke te lag num fà’ mbu mi.” (Esaya 5:12). “Kà pin fùte wut tsine! ke pàkattù, ke ghakelèn Nsi, ke ghaghù màndà, ke pennebole, ke ghakô yôg ngùà, ke pàtshô, ke ghaghe’te, ke ghabumndu’, ke ghasondon, ke fimntshu lo ke nsi ghù yub pag i ntùm nufen Nsi.” (1 Pàkôrintô 6:9,10). Nukebwô pe ntswite wul i ntùm ze pen mat num nsitsha’ fitnu ñwà’ni (Pàgalatia 5:10-21). “Là mfà’ mbàb wut num ndà’te wul i, a pà men ni ndù: Ne kale, yôg ñu’u, yôg ngùà, nefà’nsi neto, nu ka, kebàn, ntsha, ghe’te, tshuàgntù, nedyag ntsha, fagte, nkwater nzenze, myag ghe’te, nebumndu’, ne jù yàme, mbà tsemo’ tshu ts’a fute tshen ni là; me bwômbwe ntshob pin, me lo à to’ tshob pin ndù pen tse po num ngù lèn tshen tshu li là ke nsi ghù yub pag i ntùm nufen Nsi.” “Kà pin ke mbum ndu’, a num mfà yôg kebwô, là

pin dun ntùm ywèlè.” (Pàéfésô 5:18). Tshù mbà Yésu tshwèt nke ntsiañ pen, nke ntshob pen tse ntù yub tshwèt nkù li.

“A pe ze ntù mèn tshwèt nkù là, a se’ ntèl àm, nu ntse — Njòñ zin fa tse ntù tsin kù là, pin se’ nu ntse; mbà mèn z’a ke’ ghù nkàb là se’e: Pin se’e, pin jun njù. Pin se’e, pin jun ndu’ po mbùn, ke nkàb pàm, ke fà sàm ju.” (Esaya 55:1). “Mèn z’a nsi nu ntse mi me nsi fà yi là, ntù i ke nsi pèn kù mo’ yòñ i, là ntse mi me nsi fà yi là nsi tù’ lagntse num i, se ntse nsi tum bwe num yòg matmat là.” (Yohané 4:14).

**4. TSWEMÀNKO’** — ke ndà’t’à lò, mbà mat ne ke nkà’ ju z’a fe mbe po à’ ghù sènni l’a ndamnjà, mbà nu ka. Sagntù pe a nukebwò ze ka num nkag là. Tshu tse ndò pe nkò là num nzwi i nummbe mbu mi pe nga ne fà’ à. A pe nkù ntù num tshu ts’a kò là, njòñ lé’njù fa.” (Tànkùt 21:25,26). Yoshua lo tshob pònke’ Israèl ndù: “Kà pin ko ywèn ne kwé ngò ndo’ ngù zin yi.” Mèntùn nyañtu pe ndèt wut num ne pam nu Nsi. Yésu tshob ndù: “Pin kagtùn num netsho à nzendà z’a fét là.” (Lukas 13:24) — Mèn z’a dyag là, mb’ à’ fon.” Fe num tse lé’njù Yohané nganyu’ penntùn ntse tà nse’ nkum ndònni, po tshwèt nkagtùn netsho ntùm nufen kamànyam ntùm neta, pen neta tshwèt ntsho bwe tùn. (Matio 11:12).

Ne ko ywèn num yòg matmat, mbèn nke nko ywène mbà pe ntù tshag tswe mebwo ntùm ywèlè là, num nèn nkum ntùm nebi. Yen nà num ntshètte pen ndù kà pe tshà’te Nsi, ndyag nu Nsi z’a tshote là, ke lo’ nkà’ni Nsi, z’a yàm ntshuate là ngù ze pen yi; myagt’ é pà vù matmat. Ngelañ ze Nsi pe ntshob nu wù, nke nde’t’o mb’o fà ntù o yi sènni là, Satan nke ntshòb wù ndù o pam i à ndamnjà, ke mo’ lé’njù ze ntù o kò lo; kwà’ nenùne o ke nsi pam i mbà sàm lé’njù ntshù’. A tshuate ndùlàlà o pe kwù ndù Nsi ke’ yòg o, Kristò ke lagte nukebwò tsho. Nsi tshob ndù: “Sènni, a pe ze pin ju’ nz’ é là, kà pin sag ntù tsine.” (Penhébèr 3:7-8). Penntùn si’i tse po yà pe kwù nke nkà’ lé’njù

ze po nsi pam Nsi là, ke pam i mbà sàm lé'njù ntshù' à? O ke pèn ngù ndamnjù.

Pen nesèn tse po pe Afrika pag ntèn nà, num ndo' ghà'tswemànkò' nke ndo' ntàm ka sub yi. (A lo pe mo' ngelañ mum ngò Bamiléléké, po nke nkeb ntsha po tswemànkò'). A pe num seve nke ndà't'a nukebwò nu ka, ke pamntù num nsà lo, ke ne tshañ ngàm no, ke ne ke ntshob njùà ka lo... ntshùà ne yé'te num Nsi z'a pe ntùn nà. Njògmbé ngelañ ngokèt, lañte, nge' yàme mbà bwôn, ñwà'ni Nsi tshob ndù pag à pin kwà' ntsiañ Nsi z'a pe ntùn nà, z'a kú'ni ne ywimte pen nà, ntshùà ne yé't'a num mbwòli ke likebwò lo. "Yawé pe ngù nku mèn ta nsi, nku mèn ta, nzin mi nke mbwò Yawé." (Yobkwi 37:23). "Yawé pe ngù nku mèn ta mbèn nke ntsiañte num mànz'é; a vù nsi mb'a ke vù a yòñ ntshù'... "Nummb'a ke pà pag ntum nyam, pag mbi nyam, ke kònkwa lo ze ne bù'te mèn pe mfe bwe là. Là Nsi pà ngatsho'te ntsha, a pe mà' mo' mèn nsi, mbù' mo' mèn tù." (Yobkwi 75:6,7). Nsi lo fà men ntshù' li pònke' Israèl ntshob ndù: "Kà po fon sàm mèn z'a num nton nshum i ke ngon i lo mbwòge, netèt pin, sàm mèn z'a num mfà' fà' ne tshañ ngàme, ke ngaka lo, ke ngatshob nu ndamnjù lo, ke ngansà lo, ke ngalo' ntù mèn no, ke ngatam mènntùn fu lo, sàm mèn z'a num njòg shun poa pen tse po num ntshopte poa pà ywèle, ke ngatshob njùà ka lo, ke sàm mèn z'a num mbètte nu fepenntùn no. Nummbe mbà we lo z'a num ngù tshen tshu li là pe a kwà' pagkèt mèn mbwe Yawé." (Nebwògte 18:10-12). "Pàmbù, ghaka, pàkattù, ghazwi penntùn, ghaghamte nsi neto, njòn ghakò tatte fa mbà njòñ ghatatte fa nsi tsin à njam ngò." (Apokalypse 22:15). "Kà pin yòg shun pin à pen tse po pe ntshobte poa pàywèle, ke ghatshañ ngàm no; kà pin à po pe num sàm nu, mbwòg ndù kà pin à po sagte wut tsine. Me pà Yawé Nsi zin." (Lévitiko 19:31). "A pe ze po tshob pin ndù: Pin pètte pà mfe nu, ke ndù pin pètte ghalèn nu ndamnjù, ke ghangàm no nu là, pin bùnte ntshob po ndù: Tà' ngò ke' ke mbèt'ta Nsi i nu ké? p'a pètte pà mfe nu mfà num penntùn

ké? Num ntshù' po kwénta! A pe ze po ke' tshob ndùlálà, là mb'a pe mfògnjù ke pèn mbe num ze tu ngò." (Esaya 8:19,20).

Ndùs'o tshwèt nsiañ yen metsit ñwà'ni li là, Nsi tshwèt nke ntshob nu wù mbèn nke nde't'o mb'o kañ ntù o mbèn nkag yôg su se kebwô nsi, là ywèt tswemànkò' z'a pe ntùm ntù o là tshwèt nke ntàgt'o num mat nzenze mb'o jù' yen nu l'a ndù mànjam mbèn nke nkagtùn ngù ndù ntù o ke mbwôge, nke ntshob ndù: "ke ze fèt tshàm, ke shun tshàm no, ke penntùn no nsi tshob num àm, a pe ze me kañ ntù àm à? A nsi pe num àm à ndù ke ngelañ ze me ke' pèn nyañ tshu, ke ne nyañ sa lo, ke pèn ngù yàm pag i ntùm ngù'a yen njù li à?" Z'a fe mbe ndù w'à' yen fu' ke ndù i z'a pe num Yésu là, fitentù z'a nsi fà wù là, tsiañte i ke mi, nkuni mi, yôg matmat z'a dun pe ntswe mebwo là, o nke njen à pe ndà'tshu ts'o nsi fañ num nsitshà' là, tse w'à' kag nsi ndùs'o nsi pam mbe Kristô se' ntswe ntùm ntù o là, ndà' ndù ne bwôg penntùn mbà ne bwôg vùkob nke ndo' o ngù kwàn Satan yi... "Mbà njôn pon fa pà tse lem mbà mbàb là tu wul i (Yésu) lo tù' ze pe ndañdañ ndùlálà ndù a tshua njam vù se mbyagte Tà vù, yen nà pà ndù Satan, mbà ndù a kwé njôn yôg sub fa là." (PenHébèr 2:14,15). Ywèt ts'a tshwèt nke ntènt'o mb'o pam Nsi à mo' lé'njù là tshwèt nke nsag ntù o ndù a ta mbà ghà' tswemànkò' là.

**5. NZWIMÀNTÔ** —pà tà'tshuàgkèt nyàm mbèn nke mfètte lem. Kebàn, yantù mbà ntshù kebwô pèn nke njà tô ntù mènntùn; njôn ngelañ fa, tshen nukebwô là pèn nke ngù kà mèn nke nzwi mfèl i. P'o kagtùn ne wà' ntshù kebwô, o pèn nku'ni ne ghù a mi tà nkum lé'njù s'a nsi pèt mbà màngàn nà. A fe mbwô mb'o pam mbe yen nu li pà nenùne mbèn mbètte Yésu mb'a kwé o pu yen ntù kebwô li. "Ndônni kà pin pèn nja ntù." (Neto'te 45:5). "Fañ yantù là, wà' tshuàgntù, kà ya ntù, mbwôg ndù k'o ghù nukebwô." (Yobkwi 37:8). "Tshuàgntù pe njàb nu, yantù nke mbùn dù', là we z'a ku'ni ne tsin tù mbwe lànghe' à?" (Tànküt 27:4). "Kà nànte ntùm ywèt tsho num ne ya ntù, nummbe yantù

ke nô à num ndântù pàkagni.” (Eklésiaste 7:9; 11:10). “Là ndônni pin wà’ yantù, tshuagntù, nukebwô, tshàpte, ntshob kebwô.” (PàKôlôsé 3:8). “Pin ya ntù, là kà pin ghù nukebwô: kà lagnyam pi, ke pe ndù yantù zin mi; kà pin fà dù’ Satan!” (Pàéfésô 4:26,27).

Mbe’ yàm penntùn num bwe tse po num ndyag ne nu ndu’, ke ne yagte mbà’ lo kà ndo’ mfite yantù yub yi là, “ndu’ mub pà njônhy nyu. A pà tshuagkèt tsheb pàswenyu.” (Nebwôgte 32:33). Ne yagte mbà’ pe ndümte ntù penkebwô, là Nsi tshob mbe ndà’ yi pèn ke yagte mbà’ à. (Pàrômà 12:17-21). Yésu tshob ndù: “Kô mèn z’a ghepte mban o là mbà tu wul o là.” (Marko 12:31). “Pin kô ghakebàn tsine.” (Màtio 5:44). “A pe ze pin num ndagte mfànnu penntùn po là mbà Tà zin mfe kamànyam nsi lagte zin ze.” (Matio 6:14). Ywèt yantù po ne tshopte tun ntô pèn mbe à pagkèt nu mbwe Nsi. Pàghe’te kebwô ts’a pe nkag ntsho mbèn ngù lem fètte là pe ntùm ntù mènntùn nà. (Yàkobo 4:1-4). Tshù ju z’a ghù k’a mbe à’ fà ko’ fite mum ntù pen, a pe ze pag à pin kô ndù yen fite là ghupte là.

**6. NYU** — lo tatte Eva ntùm nkà’ Eden. A lo sate mbwô ntamte ze mènntùn nà’ ngù po Nsi là, mbèn nsa nzwit mènntùn. Satan z’a nà’ mbe tà’ angèl z’a yà vù nsi là, lo ghù lànghe’ num Adam po Eva ndüse Nsi nà’ njàb yub num nsitshà’ po à po pèn nke ntshob nju’ kwà’ mebwô là. Lànghe’ pèn nà’ ngù kà Satan njù’ ne sate nzwit yub mbèn ne nsate yôg sub se mebwô se poa Nsi nà’ nke njôg yi là. Pe lèn lànghe’ Satan mbile mbà ghe’te mbile num nke ntswe ntùm ntù tsemo’ penntùn ndüse po yen fèt tshob nke ntswe mebwô mbèn nke ntsiañte là. “Lànghe’ pà ndèn ke ko vù ndañndañ mbà ngô fepenntùn nà.” (Kwi Bà nkwi 8:6). A pe mà’ nkwate kebwô ntùm ntù mèn mbèn mbaggte ntswendà tsemo’ penntùn; a pe ngù po zwi mbà mènntùn. Yen nu li num njà pe mum nandà. Lànghe’ pèn mbe kôtun nge’ yàme mbà kebàn ntùm njù: ntàne, dù’fà’ mbà tsemo’ nu ntùm yôg. Mbà ghafà’ Nsi, ghatshob Nu Nsi poa pàkam Nsi ke’ tum nka bwe. A pèn mbwô ndù po zete, mbém’té njôn ngelañ fa, ngù

ndù po dun zenu mbwòg ndù kà nge'tsho mum fà' sub ntshuà'ta njam ywèt Satan z'a p'a lànghe' ndùse Nsi tum mo' ngafà' i num yub dù' là.

**7. METU'** — ke nkém wul i à po' tshà 'a mbèn mbe nsenni à keki jù ke ywèt. “Nga njòñ nukebwò fa pà nkòni nkàb.” (1 Timotio 6:10). Mo' lèn metu' num mbe kongo nke mfèt ntàmbià' tshuayà' i, kà mbe myagte mbèle, nkwù. Mènntùn z'a pe njù ke ywètz là, ke' ku'ni ne nywit pu i njwimte bwòñbwòñ poa ghayenngé', là a num nkagtùn ne lo' kupte ke nu nenùn no ntse'te nkàb yen njù li yi, mbà mbà nse'ngo' po kùafe à' se' mfèl i fa là. Ze tu wut Yésu tshob ndù: “Kà pin ke ntse'te tshunkàb tsin num nsitshà'à, dù' ze nse'ngo' mbà kùafe num mbaggte ju bwe, dù' ze pàtshò pe ntswe' ndà njé là. Là pin ke ntse'te tshunkàb tsin mfe kamànyam, dù' ze nse'ngo' ke kùafe lo ke' pe baggte ju, pàtshò ke pèn ntswe' ndà, njé là; nummbe dù' ze junkàb o pe là, mbà mbà ntù o pà bwe.” (Matio 6:19-22). Akan poa njòñ tse pen fa lo kwù nummb'a lo ke nkò gol, nkàb, ndòñ tse tanjòñ mbà mbwò mbwò nzwe (Yoshua 7) Yudà Iskariot mo' ngazi'te nu Yésu, lo ghet mbi, nkwù, nummbe nkòni nkàb lo ghù a swèn Tshuaben i, ngatswit'é. Nukebwò ke num nkàb ke gol lo, là num nkòni nkàb z'a pe ndemte ntùm ntù mènntùn nà. Mbe' yàm pàndum poa pènzwi, mum njòñ nzwit penntùn fa, num nke nkag ngokèt num po mbà num fèt tshobe njam ghe'te kebwò, num ne ghù ntshà'-ntshà' nkàb njam tô ne tame mbà nkwà ne fiage poa nkàb yàme mbà num nkwà'nkwà' nyàmdiañe, ke nkwà'nkwà' pàmbù lo. Ne nànte ngù nkàb ke ghùtni wut, ke njà zin nkum à num mbi ne ghele po ne zwi mèn. Nkòni nkàb po ghe'te kebwò ke njà zin à ku ntshù' po ne kò mbe penntùn gham'to mbà ne bàb ndù'. K'a pà pe ne ghù neta num nkùnkù (politik) ne tô tsemo' pen yi lo, ke neta num nkàb ne fétte bwòñbwòñ no; ke mbà neta num Nu Nsi z'a pe ngù tsemo' pen nke mvogte ne tshagte ndà-Nsi ntshuà Kristò lo. Ngù ndulàlà, po nke ntsho'te mbèn nso ntsha tu “pennelàne” tse po pe nzin njam Kristò ke lat num tà' ndà-Nsi



là. (Marko 9:38-40). Yésu tshob ndù: “Pin pàm nà, nzete num ze’te, nummbe yôg mènntùn ke’ yét’à num tshu tse, a pe z’a ghù a yàm mbà ne yàm nà.” (Lukas 12:15). Tshù tshô nkagni ngankàb li.

“Nà mo’ ngankàb lo fà tshu yàme. A kwate tu i, ntshob ndù: M’à’ ghù à ndù ke? Nummbe me ke’ ghù dù’ ne yàb tshu tshàm bwe. A tshob ndù: Tshù ju me nsi ghù li: M’à’ kam njòñ tshàm nta fa, nkañ nkut tse ndùbndùb yi, ntse’te njòñ nsa màmbà, njòñ tshu tshàm fa ntùm bwe, ntshob ntù àm ndù: Ntù àm! O ghù tshu ts’o lé’ num ngu’njù yàm nà yàme, fite wul o, njù, nu, mbèn ntsiañte tsho. Là Nsi tshob yi ndù: Nkagni, pe num yen tèttswe’ li, po nsi pètto ntù o, we z’a nsi ghù tshu ts’o nàpte l’à? A nsi se’ pà pe ndańdań num mèn z’a pe ntse’te nkàb num tu wul i, ke pe ngankàb num myag Nsi là.” (Lukas 12:16-21). “Nummbe a pe ze mèn ghù njòñ ngò njù li fa, yôg se pi là, mb’à’ ywimté ke? Ze pe mèn fà ndo’ mbate yôg se yi là pà ke?” (Marko 8:36-37). Yésu tshob ndù: “Kà pin lab wut tsin num yôg sine, num ju ze pin jù là... Yôg tanjòñ ntshùà jujú... Njòñ tshen tshu là fa, a pà ghakelèn Nsi tse ntùm yen njù li pèn nke ndyag ndùlàlà. Tà zin lèn ndù pin bwòñ tshen tshu là. Pin bwògmbwe ndyag ndà’ nufen se, njòñ tshen tshu là fa nsi se’ pin njam bwe... Nummbe dù’ ze nkàb zin pe là, mbà ntù tsin pèn bwe.” (Lukas 12:22-34).

**8. SATAN** — Tà njòñ ghatatte fa mbà njòñ tatte fa pe nsenni à ngakag njòñ nukebwò fa. A pà yi pèn nke ntò ntù mènntùn. Yésu tshob ndù: “Pin ghù tà zin z’a pà Satan nà, a tse nekò tà zin nà tse pin tshwèt nkò neghù a pumte là. Yen mèn nà pà ngazwimèn fe neto’te, a lo ke to’ tsin ntùm nenùne. Nummbe nenùn ke’ pe num i. A num mbe ngelañ z’a tshob tatte là, a tshob à pe kwà’ ju z’a pe yi là, nummbe a pà ngatatte, mbà tà tatte.” (Yohané 8:44). Tatte z’o tshob ke lèn nà pe a pagkèt nu ndańdań mbà tà tatte ndùb là. Tsemo’ tatte num bwe tse po pe ntshob mbe po “kite” là mbà tse po num “ngù” là. Tà’

ngamfùm pà ngatatte nummb'a ke mbam à tà' Nsi z'a ke' pe tatte là. Tà' mènkrìstò ke' ku'ni ne tatte. "A pe ze pag à pin tshob ndù pag à pin po tamte, là nke nzin ntùm njame nà, mbà pag à pin tatte, ke ke ngù nu nenùne." (1 Yohané 1:6). "Pàmbù, ghaka, pàkattù, ghazwi penntùn, ghaghamte nsi neto, njòh ghakò tatte fa mbà njòh ghatatte fa nsi tsin à njam ngò." (Apokalypse 22:15). Ngakwénta tatte po mèn z'a pe ntatte là pe netèt tshu sàmmbàa tse Yawé Nsi num mbàn nà. (Tànkùt 6:16-19).

**9. SA MÀNWÙ** — ke ndà't'à nzentù mum ntù mbà zit mènntùn nyañtu lo, Num sen seve li, a sèn, mbage, nsagte mbèn nke nzi ntshùat'à njam nukebwò tse mèn pe ngù njòh ndù fa, nke ndèn nà, mbà ts'a ke' lèn nà, mbà tse po ne tèt'è là, k'a ke pèn nku'ni ne tsho'te ko' ngùninu mi. Yen nzentù kebwò li pe mbe mo' ngelañ ntswe ndù kam, mbèn mbe mo' yòh i nsà' kame. A num ntsho'te ndùs'a fe mbwò mb'a lagte là, mbèn ndagte ndùs'a fe mbwò ndù a tsho'te là. "Ywèt tshob ndende ndù: A nsi pe ngelañ mánjam, tsemo' pen gha pamntù, ndat num pàywèt fùte mbà num netswite ywètkebwò, njam nkùnkù ghatshob tatte tse po ton ko' nzentù yub..." (1 Timotio 4:1,2). "Pag à pin ghepte, ngù ntù nenùn ntùm nedun pamntù, pen tse pe lànte ntù pen num nzentù ze kebwò, nsòg wut pen ntse nelàn nà." (PenHébèr 10:22). Po ton yen ntù là po tùne z'a dum kwà' mebwò là.

**10. LAG NSI** — pe njen njòh tshu fa ts'a num ntshùa mum ntù mènntùn nà. Sàm ju ke' pe lemte num lag se s'a pe mbà ngwatmbwòg là; tshù ju z'a ghù k'à nke njen njòh nkwatenu nelemtè fa mbà njòh ntàmntenu ntù fa là. "Sàm mèn ke' lemte mbwe i, njòh tshu fa pà tunntòg mbà nge num myag mi, yi ze pe nsi siañte mbwe i là." (PenHébèr 4:13; Yobkwi 139:1-24; Yérimia 23:23,24). (Ntùm tshen pàseve li, lag ke mbèn ndà't'a mbà se mènntùn pe ntshù yi là).

**11. PONTSIT NGWATMBWÔGE** — ts'a diañ ntù mèn mbum

nà, ke ndà't'à nkôni Nsi z'a pe ndiañ ntù mènkebwô mbum nà. (Pàrômà 5:20). A pà nenùn mbe Nsi pe mbàn nukebwô, là nke nkô pen; a ke pèn nkô ndù mènkebwô kwù, là ndù a kañ ntù i nse' njôge. (2 Pétro 3:9; Ezékiel 18:32; 33:11). Yésu lo se' ne yôg à penkebwô. (Lukas 15:10). Tsiañte ndùb num mbe mfe kamànyam num ndà' tà' mènkebwô z'a kañ ntù i là. Mbà pontsit ngwatmbwôg pe ntshob nu mfà num lem Yésu Kristô "Mèn njumbwe Nsi z'a ket nukebwô njù là." (Yohané 1:29).


**12. ANGÈL** — Ke ndà't'à ntshob Nsi (Apokalypse 14:6,7), Ìnsi kô ne tshob nu màndum mbà mènzwì ze nukebwô tse tshwèt nke mbe' kekol i là, ndù a ghom wul i mbèn mbam ndù nkà' z'a pe nkôni Nsi là tsho mum ntù i. (Matio 11:28-30).

**13. BWÒNSAÑE** — pà keki ywèt nelàne, ywèt nu nenùne z'a pe ndà'te mbà nukebwô pe là, mbà nu netsin pe là, mbà nu netsho'tentsha pe là. (Matio 3:16; Yohané 16:8). Ywèt nelàn pe nsenni à njam njù. A ke pà ntùm ntù mèn. Pe à ke ghô dù' ze nukebwô pèn nke ntô là.

A pe ze seve yen ntù li tshwèt nke ndà'te mat ko' ntù o là, o kwà' nsòñ Tshùaben. Ghà' ntù o yi mbèn mfañ nkà' z'a ntùm ntshob mi là, tsho ntùm bwe. "Pam Tshùaben Yésu Kristô o nsi yôge." (Mfà'Gha 16:31). Nsi kô ne ghù ndù a bumte, a kà' ne bate ntù o, mfà ze nswe wù, ze ywèt nswe pèn nke ntshag'té là. (Ezek. 11:19-20). Seve mbatte pàa nsi là't'é.

## SEVE MBATTE PÀA

Sen seve li ke ndà't'à ntù mènntùn z'a kañ ntù i, nke nto'te ne dyag Nsi là. Angèl tshùb ntobi z'a pe Ntshob Nsi mbe "ntùn, mbà neta, nke ntshùag ntshùà njòñ ntobi tshùàg njam pàa fa, nke ntsho tà nkum ntùm ntù mbà ywèle, ntùm nga mbà nzit vòge, nke ntsho'te ntenu mbà nkwatenu ntù." (PenHébèr 4:12). "Penntùn pe nkwù yòñ ntshù', ntù' ke mbéb à netsho'tentsha..."



2. NTÙ MÈNKEBWO Z'A TSHWÈT NDYAG YÔG  
MATMAT LÀ

(Pen Héber 9:27). Ndùlala ntshob Nsi num nke nkwihte mènntùn mbe “nkàpfà’ nukebwò pà vùkob, là ju kondèn Nsi pà yòg matmat njam Kristò Yésu Tshùaben pen.” (Pàròmà 6:23). Po nsi mà’ mènkebwò mbà mèn z’a ke’ pam nà num lagmbwòg njòg se nedume. (Apòk. 21:8).

Angèl tshùb tà’ katu ntùm mo’ pu i. Yen ni nke ngù mènkebwò nke nkwihte mbe njòh pen fa à’ kwù. Wut pen ze pe num nkò i neshu, ze pe num nkapt’é nzwe, nkém i, mbèn nàpt’é mebwo, mbèn ntwint’é, mfà tshu tse pe num nge’te là yi là, nsi kwù, nsàmte, mbé’ fèl i, là ywèt tshag mbà zwiag sag, ts’a pe ntswe matmat là, nsi pe mo’ lé’njù tsìn mbwe Nsi num netsho’te ntsha. (2 Pàkòr 5:10).

Nsenni pag tshwèt nke njen mènkebwò nke nto’te ne ju’ ntshob Nsi mbèn ngà’ ntù i num nkòni Nsi. Ywèt Nelàne to’te ne ké’ nkà’ i ntùm yen ntù li ze nukebwò ghù a sèn nà. Nkà’Nsi ké’ mum tempèl ni mbèn ntà’ njòh njame fa. Pànyàm nzenze, tse po pe a keki nukebwò là, kù ntume. Mfèl àm ze tanjòh, tshù ju z’a ghù kà me nke ntshob wù ndù o pam mbe Yésu, z’a pe nkà’ ntùm njù là, tsho ntùm ntù o ntà’ njame po mfà’ mi mum bwe, ndańdań mbà sen seve li tshwèt ndà’te là. Yésu tshob ndù: “Tu wul àm, me pà nkà’ ntùm njù, mèn z’a tam njam àm nà ke nsi zin ntùm njame; là, a nsi ghù nkà’ yòg.” (Yohané 8:12). Mbà sàm lé’njù ntshù’ o ke’ ku’ni ne lo’ yu neta, ke ko’ yu zenu lo, ke zenu tsemo’ pen no, ntà’ njame po mfà’ mi ntùm ntù o. Kwà’ nenùne mat z’a fùage mbèn mbwò là, ndà’ mat ne ghù njame kù pà ne fań nkà’ tsho ntùm ntù o nummbe njame p’a nukebwò tshage. A num mbe ngelań kum njame, mańwù po pànsa mańwù nke nké’ nkà’ pen metsili, là ngelań ze lagnyam tum nà, njame po njòh nkà’ tse po tshwèt nké’ metsili là bite fa. Yésu pà “lagnyam nunetsine.” Ngelań ze Tshùaben nà’ ntsho ntùm ndà-Nsi Yérusalém nà, a tà’ njòh pen fa tse po ke nswèn pàmfo, pànjumbwe mbà pàbwòńtambia’, ntèn pàtéble ghabate nkàb ntamte nsi, ntshob ndù: “Po lo kite ndù: Po nsi tsiań ndà

àm ndà tshà'te Nsi. Là pin ghù a kañ ntù' ngab pàtshò." (Matio 21:13).

A fe mbwô mbe ntù o pe a ndà-Nsi, kwà' ko' ndà i. A kô ne tswe mum bwe, napt'é mebô, nso nkà' mum bwe à dun, mbà nkôni po tsiañt'é. Yésu lo ke se' ntùm njù à ndà' ne lagte nukebwô pen. Là, a nà' se' ne kwé pen pu neta nukebwô z'a pe ntô pen nà. "A ndùlâlà, a pe ze Mèn ghù pin tù' zin tu là, mbà pin nsi tswe kwà' zin tu." (Yohané 8:36).

## SEVE MBATTE TAT

Sen seve li ke ndà't'a mat ntù tà' mènkebwô z'a kañ ntù i kwà' nenùn nà. Ndônni, a tswèt mvôg wul i num nukebwô yàme ts'a ghù kà Yésu kwù num fantà'tù là; nukebwô ts'a pag neshu mbà ts'a kuni là. Ngelañ z'a yen fantà'tù ze angèl Ntshob Nsi tshwèt nke ntswite yi là, yen nà nke mbe'te ntù i, mbèn nke nsopte ntù i, a kañ mfèn i ntam mbe' yàm nukebwô tse yi kwà' nenùne, mbà njôn ngò ntù i fa pèn nke nywin num bwe; Ndùs'a yen Nkôni Nsi ze ndùb tswite wul i num Yésu Kristô là, yen Nkôni là tsho mum ntù i, a pèn nto'te ne lèn mbe Yésu-Kristô, Mèn Nsi, se' ne kel à nukebwô tse, num mb'a pam ne kwù num kamtù ndon, num ze dù' là.

Mbà po nà' ndab Yésu shwà'a, nte tshe' njô tu i, po pèn nkwiimte mbu mi mbà nku mi poa nywilo, a kwù num fantà'tù num nukebwô pen nà, nke ntum num myag mènkebwô z'a kañ ntù i kwà' nenùn n'a nswe nswe mbà ntùm nelàne, mbèn nke ngùtni ntù i mbà yôg se. A num mbe siañ Nwà'ni Nsi, nke njen tu wul i mum bwe ndańdań mb'a yen a ntùm yentese là, a pèn nke ngom wul i njen mb'a nèn ngùanesa mbañ Nsi, mbà njôn mb'a fàn ntshù' mi là. Ntù i pe'te tà nkum mum bwe. Ndùs'a ghà' ntù i mbwe Nsi ntùm ntsenyà, ndàn neshu là, Yésu kù'te nse' mbañ i. Nkôni mbà fite dun ntùm ntù i ndùs'a to'te ne lèn mbe "lem Yésu Kristô, Mèn Nsi, lànte pen num njôn nukebwô





3. NTÙ MÈN Z'A KAN NTÙ I LÀ



fa" là. (1 Yohané 1:7). "Yésu pà mbañ pen tse ntù yub pe'te là, nke njôg pen tse ntù yub tshwèt mvètte là." (Yobkwi 34:19). Ntshob Nsi pe ntshob mo' dù' ndù: "Yawé pèn ntshobe. Tshù mèn ze me nsi te lag num i li: a p'a num mèn z'a tshwèt njen nge', ndù ntù i bot, a nke mvètte num ntshob mà m nà." (Esaya 66:2). Pe mèn ndà' ndà' Ywèt Nsi nke ntage men ntshob Yésu li tòn i. "Nshum à m (ngon à m) nèn tsho fite; nukebwò tsho mi." (Marko 2:5). A num mbèn nke ndòte fantà'tù, njen mbà lem Yésu fètte là, mbam mbe yen nu li nà' mbumt'a num ko' ze tu wut, wul i nke mfùag ndà'ndà' num lèt nukebwò tse, nummbe tu wut Yésu lo ket nge' mbà ntobni pen. A yen ndù po nà' nkag mfañ num i à num nukebwò pen. "Mbà ndù Yawé lo ghù njôñ mfànnu pen fa vù num i (Esaya 53).

Ndònni nkà' Ywèt Nelàn dun mum ntù i z'a nà' mbe mbwembwe nsagte mbèn mb'a ntùm kum njame nà; Ywèt Nelàn tshùà njam lem Yésu nsôg i ngù a fôg mbà mbem nà. "A pe ze nukebwò tsin sèn mbà kekimbwôg là, mb'a nsi fôg mbà mbem nà, a pe z'a pa mbà bù là, mb'a nsi fôg mbà ndeb là." (Esaya 1:18). "Tshen Ywèt là pe nkwe nta po ywèt pen ndù pag à pin pà pon Nsi." (Pàrômà 8:16). Ndònni à lèn kwà' nenùn ndù: "Mèntùn z'a pam Tshùaben Yésu là, ke pi, là a nsi ghù yôg matmat." (Yohané 3:16). Nummbe "pag à pin ghù netshu' num i njam lem tse, ngù nelagte mfànnu pen njam kondèn i ze ndùb." (Pàéfésô 1:7). Ndònni, ne ke nkù ntù neshu num ne yôg njam Nsi po ne fà' fà' se "yi z'a bwôgmbwe nkô pen nà", kwé mbwe ghe'te mbàb wut mbà tse nukebwò. Mb'a nà' nke nkô njù mbà tshu ts'a pe ntùm njù là, a nke nkô Nsi ndònni mbà tshu nu Nsi.

Ntùm sèn seve li, pànyàm ts'a tshwèt ndà'te nukebwò nzenze là, tum ntùm ntù yen mèn ni; là Satan z'a ke' kô ne kag ze dù'ntswe nsi là, tshwèt nke ndòte njam, nke nywinte ne pèn ntsho bwe mo' yôñ i. Tshù ju z'a ghù kà Tshùaben Yésu nke ntshob pen ndù pe zi tshùalo, ntshà'te Nsi, ndo' nde' Satan

ntsho yi ndù a nèn ngùanesa mbañ pen nà.

## SEVE MBATTE KWÀ

Sen seve li tshwèt nke ndà'te tà' mènkrìstò z'a fon fite ke ndù i mbà netshu' njam jule'te Tshùaben pen mbà ngayòg pen Yésu-Kristò là, a ke tshwèt mbèn ntà'nsòñ "num sàm ju mb'a pà ndà' num fantà'tù Tshùaben pen Yésu Kristò, num ze tu po lo kwimte njù num fantà'tù, mbà po nà' nkwiimte mbà tu wul i num fantà'tù num njù là." (Pàgalatia 6:14).

Yésu lo kwù num fantà'tù ndù pe tshuate njam i, nku'ni ne "fagte num nukebwò mbèn njòg num nu netsine" (1 Pétrò 2:24); mbèn nku'ni ne pe tà' mènkrìstò ze po kwim'té num njù là. Ñwà'ni (Pàgalatia 5:16,25) num nke mfà ntàg pen ndù pe zin ntùm ngùninu ywèle ke pèn nke ngù ngùninu ghe'te mbàb wut. "Ndùlàlà me tshob pin ndù pin zin ntùm Ywèt mbà pin ke nsi fà' ghe'te mbàb wut." (Pàgalatia 5:25). "A pe ze pag à pin ke njòg à ntùm Ywét là, pag à pin zin à ntùm Ywèle."

Ntùm sen seve li, pag à pin tshwèt njen sañx se po nà' nsò nzwe num Yésu, ntañ i num bwe là. Pag à pin pèn nku'ni ne yen pàshwà' tse po nà' ndo' ndab i yi kwà' kebwò là, nummbe "Pe pe ghù fite ndù ze pen ne vù ntsha tsho a tu i. A p'a ntshu mfañ tse pèn ngù kà pe njate. Po nà' mbe't'é a num nukebwò pen, mbe't'é a num mfànnu pen." (Esaya 53:5). "Hérodé poa tse pen lo tshàpt'é. Po sò nzwe tse, mà' kummbañ meba num i, ndab i nshwà'a mbèn nte tshe' se po lo' njò mbà' yi là tu i," mb'a nà' mbe ndù po à' te à tshe' gol tu i là. "Po fà nkà'nesòñ ntùm pu i ze zwim," mb'a nà' mbe ndù po à' fà à kòg mfen pu i là," "Po kwim ntu nkekwi' mub nsi mbwe i, ntshàpt'é ntshob ndù: Pag tshà't'o me mfen pàyudà. Po tòg nkekùà, num i, nkwe nkà'nesòñ ndab tu i yi, Ngelañ ze po myagte ne tshàpt'é là, po sò kummbañ, má' nzwe tse num i, ndo' i nèn yi ndù po kwim'té num fantà'tù." (Matio 27:27-31).

"Mbà me là, me ke tshwèt ntà' nsòh num sàm ju, mb'a pà ndà'num fantà'tù tshùaben pen Yésu Kristò."  
(Pàgalatia 6:14).

"Po lo kwimt'am pag Kristò num fantà'tù." (Pàgalatia 2:19,20).  
"Pin kwù num nukebwò, là njòg num nsi, njam Kristò Yésu."  
(Pàròmà 6:11).



#### 4. PO KWIMT'É PO KRISTÒ NUM FANTÀ'TÙ

Mb'e yàm penkristô num bwe nke mbam à lèn, nke ntshà'te Nsi ntùm ndà-Nsi, nke ndo' jujù Nelàne, nke njob pànkwi; là, nke ntshùate njam mfà' mub mi kebwô, nke nke' mbèn nkwiwte ngayôg yub num fantà'tù. "A ke pà mèn z'a ke ntshob me ndù: Tshùaben, Tshùaben nà pèn nsi tsho ntùm nufen kamànyam, a pà ndà' mèn z'a pe ngù nekô Tàa z'a pe mfe kamànyam nà." (Matio 7:21-27).

Ntùm sen seve li, pag à pin num mfon mve' Yuda, z'a nà' nswèn Tshùaben Yésu, nswèn i num nkàb ñamntat, nummbe nkôni nkàb lo lo' ntù i, mbèn nsènte myag mi. Làmbô po tshane ... nà' mb'a tshufà' pàsoyé tse po nà' nse' ntshùb Yésu tèttswe' là. Po lo lo' bùmto ndo' ntam tô yi num kum se, ngù ndù bwôgsônte Nsi (Ntshob ghanum Nsi) bumte. (Yobkwi 22:19; Lukas 23:34; Yohané 19:24). "Po ghàpte nzwe tse mbèn ndo' kum se ntam tô yi." Po lo kwé njôn tshu fa Yésu mbèn nga i ntshob ndù: "Pag ke' kô ndù yen mèn nà tô yage." (Lukas 19:14).

Njôn penntùn fa kô ne kwé mbotni Nsi, poa mbañ mbà nyam, là po ke' kô ne ju' ntshu Nsi. Tsemo' num bwe tse po pe ndèn Nsi à ngelañ nge' mbà ntobni là.

"Mo' mèn netèt pàsoyé lo to nsah Yésu po kô; pe nduse lem mbà ntse tum." (Yohané 19:33-37). Kù'ngàb lo pe tô ndù Pétro gha Yésu yôn tat mbwe tà' ngafà' ze mènzwì; là, a lo pe ndù mànjam nkañ ntù i, ndàn neshu. (Marko 14:66-72). Kà pin num ntshùate njam ntshob min po ngùninu mine mbam Yésu à? Ke pin ke nko a tuswe num i mbwe penntùn à? "Njôn penntùn fa tse po nsi pam àm mbwe penntùn nà, mbà mbà me nsi pam yub mbwe Tàa z'a pe mfe kamànyam nà. Mèn z'a gha àm mbwe penntùn nà, mbà mbà me nsi gha i mbwe Tàa z'a pe mfe kamànyam nà." (Matio 10:32,33).

Yésu pèn ntshob ndù: "Mèn z'a ke' lo' ze fantà'tù ntam njam

àm nà, a ke' ku'ni num àm." (Matio 10:38). Ghafen pà pen tse po tsin num gholôn z'a pe à Yésu Kristô là.

Yésu pà lôñ sàm se neta  
Ntù àm ke nsi bwôg sàm ju  
Ntse nke ndune, mbà' i nke nta  
A ke ghù sàm ju num me  
Ngakwé àm mbèn mbe ngayôg àm  
Ngate't'àm pu nu yàme  
Ngafite ntù àm num nge' pà  
Kristô ngatshu' pàntùmjù.


### SEVE MBATTE TÀN

Tshù ntù mènkebwô ze kondèn mbà tshùayà' tshàmndèn Nsi yôge, ntù i pèn nsôge mbe Nelàn ni. Yen ntù li kañ ntù' kwà' ndà-Nsi, z'a p'a ze dù'ntswé Nsi Tà mbà Mèn mbà Ywèt Nelàne nda'nda' mb'a pe ntùm nkà'ni Tshùaben Yésu Kristô là: "A pe ze mèn kô àm nà, mb'a nsi lé' ntshob màm, mbà Tà à nsi kô i, mbà pag nsi se' yi, mbà pag nsi ghù dù'ntswé yag mbañ i." (Yohané 14:23). Nsi pe ntshùà njam Yésu Kristô ngù nku'ni, nañ mbotni mbèn mbù'te mènntùn. (Lukas 1:52; 1 Sam. 2:8).

Ndônni yen ntù li kañ ntù' ndà Nsi. Po tà' nukebwô k'a tum nène. Mb'a fe mbe ndù à' pà panyàm tse Satan, Tà tatte, num nke ntô là, pag à pin tshwèt ntù' yen à Ywèt-Nelàne, Ywèt nu nenùne. Ntù mèn z'a nà' mbe diañ mbàb wut là, kañ ntù' tà' mbwô tù s'a tshwèt njam ntàm ywèt mbà: Nkôni, Tsiañte, Fite, Fèntù, bwôntù, nku'ni, pamntù, bétni, nebe mèn, ne fà wut nsi, mbà tsemo' ntàm mi a bwô Nsi mbà penntùn nà. Ndônni a pà ko' kañtù Tshùaben pen Yésu Kristô, sen kañtù là pèn nke njam ntàme. Tsham men ntàm yàm nà pà ndù a ghô num Kristô, ndà' num Kristô tù' i, ntshù' mi pèn ngô num i (Yohané 15:1-10). Nummb'a dun Ywèt Nelàn mbèn nkwe kwèntse Ywèt Nelàn nà, a ghù neta ne tshùà mbàb wut mbà ghe'te tse ntsho, mbà

Nkôni  
Tsiañte  
Fite  
Fènnù  
Bwòntù

Nku'ni  
Pamntù  
Bètni (nèfite)  
Nebe mèn  
(Pàgalatia 5:22).



## 5. NDÀ-NSI

neta ne lo' nkwiwte njwèn mèn yi num fantà'tù. A ke pèn nke njôg à num ne yene, nju'u, ke ndà' ne kwag lo, l'a njam pamntù nummbe pamntù num Yésu Kristô pà ju z'a pe ngù mèn tshùà njù ntsho là. A nke njôg à ntùm nywinte ze nenùne mbà z'a pe ntùn nà; num mbà Tshùaben Yésu Kristô nsi pèn se' ndende ntùm nkuni mi là, num nke nso neta num i. A nke njôg à ntùm Nkôni mbà njam Nkôni Nsi z'a tswe matmat là.

“Ghafen pà pen tse ntù tshob làn nà, nummbe po à' ghù njen Nsi.” (Matio 5:8). Mfen David lo lèn ndù mà ntsho ndùb ke nde' à mum ko' ntù i mbà mb'a nà' ngù tshunkàb yàme mbèn ntshùà ghakebàn tse ntsho ntùm ngô wà là. Tshù ju z'a nà' ngù k'a ngom wul i num tshu ts'a nà' nke mbwôñ ntù i là, nde'te Nsi ndù: “O Nsi! nàpte ntù nswe mfà me. Kamte ywèt ne ju' ntshu num àm.” (Yobkwi 51:10). Sàm mèn netèt pen ke' ku'ni ne sôg ko' ntù i; sàm mèn ke pèn nku'ni ne nàpte ntù nelàne nte mum ndàntù i. A pà ndà' ne nywin num nukebwô tsho kwà' nenùne ndańndań mbà David nà ngù mbette Nsi mb'a fà ntù nswe yi là; yen ngelań nà yen nu li nsi bumte. Nsi kô ne ghù yen nu nswe li num pin. A ke pà ne kwitte nzwe ts'a fagte là, ndo' ngù ghanzwe ko' zin Nunetsin yi, ke ne ghù nkà'ni pànpàn no, ze pin nsi ghù ndù ntù tsin tù' dù'ntswe Nsi ze mebwô là, yi z'a num ndyag à ne ywimte zin nà, nummb'a ghù yen nkà'ni mebwô li: “Me nsi nań ntse nelàn num pin, men ntse là nsi lànte zin num njôñ ñu' min fa mbà njôñ nu nsineto zin fa. Me nsi fà ntù nswe pin, so ywèt nswe num pin. Me nsi tsho' ntù lôn ze pin ghù là, fà ntù mbàb wut pin. Me nsi so ywèt tshàm num pin, ghù pin ke nzin mb'a pe ntùm ntshù' màm nà, mbèn nke nze ntàg màm.” (Ezekiel 36:25-27). Tshù mbagte ntun kàn nswe ze Nsi lo' lem Mèn i, Yésu Kristô nte sitam bwe là.

Num sen seve li, pag à pin tshwèt nke mbèn njen Angèl. Ñ! se fà' pàangèl pà ne béb pen tse po nsi jù ntsi' yôg matmat là, po pèn ngù mfà' ne ke nte mbàn yub mbań pen tse po num mbwôg Nsi là. (Yobkwi 34:7; 91:11-12; Daniel 6:22; Matio




2:13; Mfà'Gha 5:19; 12:7-10).

Satan tshwèt mbèn nke ntswite wul i num sen seve li. A tshwèt ntsin mbañ ntù mèn, nke nyà' ngelañ z'a fà pulà, num ne pèn ntsho ntùm njwèn dù'ntswè i. Tshù ju ze ngantum Nsi num mfà ntàg pen ndù pe zi tshùalo, ntshà'te Nsi, nummbe: "Pin zete, nzi tshùalo! Ngakebàn zin, Satan, tshwèt nzinte mbà ngwàyit z'a tshwèt nkwa' là, nke ndyag mèn z'a ghom nà." (1 Pétro 5:8). A pe njà lo' wul i ngù angèl nkà' yi, nke mfùte ghabam Nsi tse po ke' tshit myag num ghe'te ts'a ntùm njù là, nke nzete kà nku'ni ne tatte ghabamntù tse nenùne tse Nsi tsho' yub là. Là, a pe ze pag à pin tatu Satan nà, mb'a nsi kù, nèn ngüanesa mbañ pen. (Yakobo 4:7).

### SEVE MBATTE NTÔGE

A pà ndènkko num yen mèn ni z'a kag pamntù nsi là. Mo' lag se mem, nummb'a to'te ne zi num yòg mènkrìstò, là mo'lag se tshwèt njen tshu ts'a pe mbañ i là mbèn nke nge'te tshu ts'a pe ntùm njù là. Nkà' z'a pe num i là bi, mbà mum ntù i, po ke tshwèt mbèn njen pàkeki ts'a pe ngù ndù a fùagwut num ne yen nge' num Krìstò là. Pàlañte ts'a tshwèt ngwù mum bwe là diañ i mbumè k'a ke ku'ni ne fènte yube. Mb'a fe mbe ndù à' ju' à nze Nsi là, a to'te ne kù' ntòñ num pàfùte ngalañte mbà nkà'ni mi tse pànpàn. Mo' ndù a tshwèt mbèn nèn ndà-Nsi, nke ndemte nkòni z'a ghù num njù là ntùm kummbañ s'a pe Nu Nsi là, là Nkòni Nsi yà fi mum ntù i. Nu nzenze yà ghàpte nkwatenu mi. A to'te ne tsho shun po tshunu njù, là nke nke' ntà'nsòñ mb'a num nkò Nsi mum ntù i. Sa mañwù z'a pe nzentù i là bi.

A ke tshwèt mbèn mfùag wut ne ket ze fantà'tù, a kañ ntù' tà' mà lèt ndùb yi k'a ke pèn nke nkò i. Pamntù i nke mbole, nshùm pag pag, a tsin ne tamte po Nsi mum tshà'te Nsi mbèn ngwù keme'e mbèn nke ntot Nu Nsi ne tole mbèn ntshüb pamntù i



6. NTÙ MÈN ZE LAÑTE TSHO I MBÈN  
NGÀPTE WUL I LÀ

fimbu; pe mèn ndà'ndà' ngalañte, z'a pe mbañ ntù i là, nyà'te ntsho mum ntù i... A nke ntsiañte ne zin ku ntshù' poa pàntùmñju mbèn nke njôg shun poa ghabamntù tse nenùne.

Ywèt ngatatu z'a pe keki ko'tewut là, dyag ne tsho ntùm bwe (ntù i). Yen mènkrìstô li nà' yà lagte mbe kondèn pànpàn nà' mbèn njôg i, ndônni a kañ nzi tà' mènkrìstô ngako'te wut. Nebumndu' ke'te nzendà i ndyag ne tsho yi ndà. Yen nu li ke nto't'a mèn ndà'ndà' k'a ke lèn ju bwe, njôgmbe ndùs'a tam ku zin poa shun tse pàghagha mbà ghaghag ngua ntùm tà' jùà dù' z'à' ke mbwôge, ke tuswe ne ke nko i lo, num mbà po lo' i mbà tà' ngazwiañte là, ke tà' mbàbùn no, ke tà' fenyu'mèn no, ke tà' nkagni lo. Yen ngelañ nà Satan nke ntàgte nu ntôn i ntshob ndù: Pe yen yôn i li ke baggte su yôg mènkrìstô. Nkwatenu mbàb wut mbà ghe'te tse nke ntswite wul yub. Mo' ngelañ a nke nkô ne mà' fiañsôn kebwô mbèn nke nèn nyañ sa, ngakebàn nke ntènt'é mb'a nèn ntùm pàdù'ngua ts'a ke' ywimte là, nke ntshob yi mb'a pe a ju z'a bwô ndù mènntùn nyañtu ke ngù là mbà ndù "ne fàn nu yôn ntshù' ke pà nukebwô."

A pà nenùn mbe pag à pin ke' ku'ni ne tshètte ndù nsañ tshwèt mi a pe keki nukebwô mbà nkwaite kebwô là, fùt num tu pen; là pe vù ntsha nduse pe pam ndù po se' ngù yub dù'ntswe num pen mbèn mfañ ndù po te nkàn yub mum ntù pen, mà' mbum ngùninu kebwô mube. A pe ze pag à pin fà metsit ntubu pen Satan, mb'a ke tag kà ke kwé njôn pu pen fa, ndo' ntù mbà ywèt tshag ntùm lag-mbwôg matmat. Tshù ju z'a ghù, Nsi tshôn'te mfà ntàg pen ndù pe kù ghe'te ngwànmèn, ke pèn nke ngù sa po nukebwô, k'a pà pe ke lèn i lo. A bwô ne kù nèn ntèt Yésu, ngatshu' pen mbà ngatshùantsho.

Mènntùn ze pin yen a sob ntù mèn num sen seve li là, ke ndà't'à ghatshàpte mbà ghakebàn Nukristô. Po num ndo' nkupntshu tshàpte mube mbà lém sub se ne ghù ndàm yi, nke nsobte mbèn nke nkag mfañ mum ntù penkrìstô; tà' ntù z'a ghàpte wul

i nzenze là, ke' ku'ni ne yôg num lèn tshen nge' li. Lèn yen mènkrîstô li ke mbwôg à penntùn ntshùà Nsi. Men nkwate li ndù: "ke ze po nsi tshob num àm à?" mbà ju ze penntùn nsi ghù num i là, nke ndo' i ngù kwàn penntùn yi, a pèn nke nèn ngùanesa mbañ Nsi. Ntshù kebwô mbà yantù nke ntsho mum yen ntù li kwà' mà neta mbèn nke ntswite wut ngelañ ntobni mbà ndùse nu tshùà i là. Kuni nyu l'ànghe' fà tu ndùse tsemo' pen ghù fu' ntshùà pen nà, ke ndùse po bwô li ntshùà pen no: mbèn ndyag (nyu lànghe'e) ne tsho mum ntù pen, a pe ze pe fañ metsit mánze yi là, num ne tsho' nzendà kebàn po ko'tewut.

A fúage ne fañ nkôni nkàb tsho mum ntù pen, a pe ze pe ke' zete num ntàg mi Tshùaben Yésu nà' mfà pen ndùs'a ke ntshob ndù: "Pin zi tshùalo ntshà'te Nsi ndù kà pin tsho ntùm lañte. Ywèt num mbame, là mbàb wut nke mbole." (Matio 26:41). Paulô nke ntshob pen ndù: "Ndùlàlà, mèn z'a kwate ndù a tsin tù là, zete ndù k'a vù nsi." (1 Pàkôr 10:12). "Pin mà' tshuntsho Nsi num pin ndù pin ku'ni netsin mbwe fùte Satan." (Pàéfésô 6:11-18).

## SEVE MBATTE SÀMMBÀA

Sen seve li tshwèt nke ndà'te ntù mèn z'a tshwèt nke mbèn njam nà. Nkà' lo ké' yen mèn ni, a pèn nzwi'te ju ze Nsi num mfà là, mbèn ngù ze pag i num Ywèt Nelàne, là a pèn m'fag ku num mánze ntùn. A tshwèt mbèn ndà'te mat mènntùn z'a ke' yôñ nto' kañntù i là, ke mènntùn z'a ke' yôñ nto' yèn wul i Nsi lo, mbà mbà po tswit'é mbèn nsôn i nu Nenùne num Ntum-Tsiañte z'a pe Nkùn Mewô là ... Tà' mènntùn z'a sag ntù i ndùse Nsi kù'te nse' mbañ i là, nsi ghù a pe nukebwô nèn mbwe, k'a kagtùn pe ndù ke lo ne sô lo' num i lo, ke ne wà' nukebwô lo. Ke ne tsiagte mal i lo.

Tu wut Yésu lo tshob nu mfà num mèn z'a pèn njam nà ntùm ñwà'ni (Lukas 11:24-26). "Ngelañ ze ywèt kebwô tum ntù mèn



7

7. NTÙ MÈN Z'A SAGE MBÈN MBÈN NJAM NÀ



nà, a nke nkatte ntùm dù' njum, nke ndyag dù' ne fite ke fon, ntshob ndù: M'à' pèn njam ntùm ndà àm dù' ze me tum bwe là. A pe pèn njam, ntèt ndà ndù po pé'te, mbèn nàpt'é kwà' mebwô. Ndùlala a pèn njam, nèn ndo' tsemo' sàmmbàa tse po pag ntshùà ze tu wut là, po à po se' nke ntswe bwe, yôg yen mèn ni pèn mbag ntshùà mb'a nà' mbe mbwe là."

2 Pétrô 2:22 "Ju ze tànkùt nenùn ke ntshob là tum po: Mbù pèn njam num ju z'a ywi' là; ngùnyàm ze po sôg i là tsho ntùm tô netob."

Tshen dù' ñwà'ni li tshwèt nke ndà'te mat ntù mèn z'a pèn njam nà kwà' mebwô, mbà mat ntù mènkebwô z'a ke' kañ ntù i là. Nukebwô pòa njôn ze zenu ne fùte mèn yi mbà ne nywit mèn pèn ngù ze dù'ntswe ntùm bwe, num ne ke ntò yen ntù li. Mbà se yen mènntùn ni tshwèt nke ndà'ta mbà ntù i lo' mbe yi là. Yen me fite bwôñsañ ni z'a pe Ywèt Nelàn nà, ke' pèn ngù ze dù'ntswe ntùm yen ntù li, nummbe nukebwô po Ywèt Nelàne ke' ku'ni ne zin ku ntshù'. Ntù mèn ke' ku'ni ne tamte mbe ndà-Nsi mbà ngàb Satan. Angèl z'a pe ntshob Nsi là, fém, nèn tse, nke mbèn ndôte njam, nke nywinte mbe pe yen mèn ni kañ ntù i nda'ndañ mbà "mèn z'a nà' mbà là." (Lukas 15:16-18). "A nke ndyag ne jù mbà jujù ze ngùnyàm num njù là, là sàm mèn ke fà yi. A lo' ntù i nèn tsham yi, ntshob ndù:... M'à' lo tù, nèn ntèt Tàà, ntshob yi ndù: Tà me lo ghù nukebwô num myag Nsi mfe kamànyam mbà num myag mu." Tà lo pe yen ndù mèn i kañ ntù i, ndagte mfà yi.

Num sen seve li, sàm kañntù ke tse bwe, yen mèn ni ke' pe lab tse wul i num Nsi mbà metsili, a ke' kô ne vù num nku Yésu ndù a lagte nukebwô tse. Po lo' tùn nedum nton nzentù i yi. A tshwèt nzi (ntswe ndù kam). Ntôn mi num bwe, l'a ke' ku'ni ne ju' nze Yésu. Myag mi num bwe, l'a ke' ku'ni ne yen ghem ke ndù i, z'a pe a lag-mbwôge z'a tshwèt nke ngà' ntshu i tun nku mi là. Tuswe ke tshwèt mbèn nko i ne lo' nukebwô

nèn yi mbwe. Satan nke ntò ntù i. A tswe mbà mfen nà num diañkwa se. Mo' ndù yen mènntùn ni ghù ntshù tà' nga ghù nku'ni, mbà mfuni neghamte Nsi, là mfut'a tufi se po sce' po mbem nà; "a num mbwô njam njù, là mbe ndù ntùm bwe dun mvôge, mbà njòñ tshu fa ts'a ke' làn nà." (Matio 23:27).

Ndõnni Tà tatte lo' ze dù' Ywèt nu nenùne. Mbà zit nyàm no, mbà zit nukebwô lo ke ntù' zin à ku ntshù' po Satan, mbèn ntam ku zin po ywètkebwô z'a lo' ntù ng'é ndõnni là. Mbà mb'a tshwèt ndyag ne kwé wul i ghaghùtni i là, po nke nkul i po nkùtùne. "Mèn z'a mà' ntshù' Mosé njam nà num nkwù ngelañ ze pen pàa ke tat lo kwé nta là, po ke ko ndèn mi. Pin ke' kwate ndù ne vù ntsha z'a tshùate là nsi vù num mèn z'a nyañte Mèn Nsi nku, ndo' lem kàn ts'a làn'té là mbà ju nesagte là, ntshàpte Ywèt Kondèn nà ké?" (Penhéber 10:28,29 pin pèn nsiañ 2 Pétro 2:1-14).

Nshun àm, a pe ze sen seve li se' mbumte po mat ntù o là, kà tag kà ke kwà' Nsi poa njòñ ngò ntù o fa. A ku'ni, mbèn nkô ne lagte njòñ nukebwô tsho fa; a pe z'o kañ ntù o kwà'nenùne, nse' ntèl i là. Se' ntèl i nda'nda' mbà ngankin nà'nse' ntèt Yésu ntshob yi ndù: "A pe z'o kô là, mb'o ku'ni neghù me làn." (Marko 1:40-41). Là, a pe z'o num nke nsag ntù o nèn yi pe mbwe, nkô njame ntshùà nkà' là, kà pèn nywinte sàm ju, mo' ngaywimt'o ke' pèn mbe, nummb'o kô vùkob ntshùà ne kô yôg. "Nummbe nkàpfa' nukebwô pà vùkob." (Pàròmà 6:23).

## **SEVE MBATTE FOME**

Nsenni pag à pin tshwèt njen vùkob nke nkù'te nse' mbañ ngakag pamntù i nsi, ke mènkebwô z'a pe njù' ne kañ ntù i à ndamnjù lo. A pe ze wut yub pe ndun à pe ngokèt là, mbà bwôg num ndun ntùm ntù tshob ndùse vùkob tshwèt nse' là.

Nkwate vùkob z'a nà' ngù a nke mvètte là, pe yi ndõnni à






**8. MYAGTE NU MÈNKEBWÒ**

tukunndà. Njòñ ngià fa ts'a nà' nke ntatt'é là yà mi, a bwò mb'a le' ntsho po vùkob z'a pe nkàpfà' nukebwò là. Nge' ts'a pe ndà-mbwòg là ghù ntù i nke mvètte, a yen ndù a ke' ku'ni ne tamte po Nsi ntùm pamntù. Ndònni a fe nkò ne tshà'te Nsi, l'a yen ndù a ke' ku'ni ne tamte po Nsi ntùm pamntù, yen Nsi là, z'a nà' nke ngwag i fe ndù ke lo là. Shun tse nke mbwòg ne tsin mbañ kunndà se, ntshob mub mi po tshwèt ndo' ntswe'te ntù i yi là, ke pèn njwimt'é sàm ju. Tshunkàb i ts'a lo' kupte ngù yi là, ke ku'ni ne kwi'te ntswe'njù mi, ke ne yòg ntù i lo, ke ne tshètte mbe kà a bèn ngwù vù lo. A yen ndù a ke' ku'ni ne ghù nkwater mebwò num Nsi nummbe Satan tshwèt ntshètt'é.

Njòñ tshu fa ts'a nà' nke nkò mbwembwe là, mbà ts'a nà' nke ntsiañte num bwe là, nke ntù' tapte njòñ i ndònni, mbà ze "ngabépmbe" ze tatte ke ku'ni ne ywimt'é ndònni. A to'te ne lèn ndù: "A bwò ne bwòg ne vù ntùm mbu Nsi z'a pe ntùn nà!" (PenHébèr 10:31). A lo nke nywinte ne tswe ntshu ntshù' po Nsi num mo' lé'njù, mo' ndù num kunndà ngokèt ke num kunndà vù lo, ndònni a yòg ndèn ndù ngelañ yà tshùà. Mbe' yàm penntùn num nkwù mbagmbag vù ke ku'ni ne dyag Nsi num sub kunndà vù. A fe mbwò ne dyag Nsi ngelañ ze mèn ku'ni ne fon i là. Num sen seve li, yen mènkebwò li z'a tshwèt mbe kwù ndù a lo pe ntùm yòg se nga kondèn po Nkòni Nsi là, ke tshwèt nju' Ntshob Nsi mi a pe mfà yòg mbèn nke ntswe'te ntù mèn nà; mb'a fe mbe ndù à'ju' nze ngayòg i là, a nke ntù ju' à nze ngatsho't'é nke ntshob ndù: "Ghandon, pin lo mbañ àm, nèn ntùm mbwòge z'a tswe yòñ ntshù', ze po nà' nàpte njàb Satan mbà Angèl tse là." (Matio 25:41). "Penntùn pe nkwù yòñ ntshù', ntù' ke mbéb à netsho'tentsha." (PenHébèr 9:27).

## SEVE MBATTE BWE'E

Sen seve li ke ndà'ta tà' mènkrìstò z'a num ntshùà ntsho nukebwò ntùm mbwòg z'a pe lañte mbà nge' yàm nà. Lañte nke nse' yi ntùm njòñ pag tse fa, a nke ngù tàntù mbèn mfènnte



9. NTÙ MÈN Z'A NUM NTSHÙA NTSO NUKEBWÓ LÀ

njôñ i fa kà nèn myagte, nke mà' ntshùà njam Yésu-Kristò. A nke "nte myag num Yésu z'a pe neto'te mbà ne myagte pamntù là," (PenHébèr 12:1-2), ngwà' njôñ lèt fa mbà nukebwò z'a diañ i mbum nà, k'a ke ku'mo' ju, mbèn nkagtùn nkù nde num yòg s'a ghà' mbwe i là. (Pàfilipi 3:12-14).

Satan poa njôñ tse pen fa diañ ntù ngabamntù mbume, nke ndyag ne tshu'tu Mèn Nsi, ndé' i num mánze netsine. Ko'tewut, Nkôni nkàb, ywèt ntàg kebwò mbà tsemo' lo' ghù mub nkeki nsenni.

Tà' kekwèn lo' ze dù' nzwimàntò, nummbe nukebwò ke njà lo' à mat nzenze ntsho yi num mèn, nke mà' nkwa tu i, ke ne lo' mo' lèn wà lo.

Là, mènkrìstò z'a tshit myag là, num mfon tun nukebwò, k'a lo' a pe Nu Nsi mà' nkwa yi tu i lo, k'a ntshù tà' angèl nkà' lo, nummbe Ntshob Nsi po Ywèt Nsi pe ntshagt'é ntùm ngjôñ nu nenùn fa. Pin tshwèt mbèn njen tà' mènntùn nke nyañ sa, ntshùb tà' ntu' ndu' pu i, num ne sòñte mènkrìstò ndù a vù ntùm lañte, nke ngù ndù ngùà yen njù li nke nziag num myag mi. Ndà' ndù yen nà ke' ku'ni ne kumte mènkrìstò z'a yàb ntù kwà' nenùne mbèn nkùwù — po Kristò — num nukebwò po njù là. Mo' mèn sobte ntù yen mèn nenùn ni. Tshù mbà ndàm, tatte, tshàpte, kotte, ke ne tsho' nku kebàn no, ze ghakebàn Nsi pe ndo' nse' yi là, num nsobte ntù tà' ngabam Nsi ze nenùn nà, njògmbe a pen tse po pe ntiañ wut yub ghabam Nsi là. A pe nkwihte men ntshob Yésu li "Ghafen nsi pà pin ngelañ ze penntùn nsi ke tshàpte zine, tsho' nku min kebàn, tshob tatte, tete nzenze nukebwò tu pin num àm nà. Pin tsiañte, ñwate ntùm tsiañte, nummbe ntsho'fà' min pà mi ndùb mfe kamànyam, a pe ndañdañ mbà po nà' ntsho' nku gphantum Nsi tse po pe mbwe pin nà kebàn nà." (Matio 5:11-12).

Njôñ ngelañ fa, nukebwò po mbàb wut ts'a pe "mbùm mèn"

nà, nke ngù njòń tshu fa ts'a ku'ni ne lé' mènkrístò num Nkòni Nsi là: ndà' ndù pag à pin ku'ni ne lo' tsiańte po tànntù ntshob poa ngantum Nsi ndù: "We z'a nsi fagte pen num nkòni Krístò à? Nge' ké? Zwentù ké? Netsho' nku kebàn ké? Nziku' ké? Tunntòg ké? Nebi ké? Nwi ké?... Là, num njòń tshen nà fa, pag à pin pà kwà' ghatshùàntsho njam mèn z'a kò pen nà." (Pàròmà 8:35,37). Ngabamntù pe mà' tshuntsho Nsi num i, nku'ni ne tsin tù ntùm lé'njù tse kebwò mbèn mà' ntshùà njòń lańte fa. Mbà pag à pin ku'ni ne pe ghatshùàntsho njam Krístò z'a num mfà neta pen nà.

Sa màńwù yen nzentù li làn mbèn nke nziage. Pamntù dun mum yen ntù li kà mfète, mbà Ywèt Nelàn nke ntswe mum bwe. Angèl Nsi tsin num i, Ntshob Nsi nke ntswit'é pànkà'ni Nsi, tse tanjòń, tse Nsi ghù ghatshùàntsho tse po pe mfènte njòń i, fa kà nèn myagte là. "Mèn z'a tshùà ntsho là, mbà me nsi ghù a jù ntàm tù yòg s'a pe ntùm paradís Nsi là." "Mèn z'a tshùà ntsho là, mbà me nsi fà mànnà z'a lemte là yi, fà mbà kwango' fògtab yi, se po kite lèn nswe num bwe là, lèn se sàm mèn ke' lèn, k'a ke ndà' mèn z'a kwé là." "Mèn z'a tshùà ntsho ndé' mfà' màm tà nèn myagte là, me nsi fà pàwà netò ngò yi..." "Mèn z'a tshùà ntsho là nsi ket nzwe fògtab pe ndańdań, me ke nsi bwete lèn se ntùm nwa'ni yòg, me nsi kwé nta lèn se mbwe Tàà mbà mbwe pàangèl tse." — "Mèn z'a tshùà ntsho là, mbà me nsi lo' i, ghù ntom yi ntùm ndà yàm Nsi, a ke pèn ntume." — Mèn z'a tshùà ntsho là, me nsi ghù pag yi tswe num ko'fen sàm... (Apokalypse 2:7,11,17,26; 3:5,12,21).

Mve' z'a ghà' nte nge là ke ndà't'a yen mènkrístò li z'a fà nkàb i Nsi là. Mb'a fe mbe ndù à' baggte tshu tse, tse nsitshà' là, a nke ndo' njwimte bwòńbwòń yi, mbé ze ntshù' num gham (ne ghàpte tshu tse nze gham, mfà nze ntshù' ndà-Nsi) mbà ze jubwòntù ndo' ngamte Nsi yi.

Mbe'te pàn po ndò ngontse nke ndà't'a mb'a pe njòg yòg ntùn

ke pèn nke ntshàm ntù là. A ke' pe nu neta ndu' nke ndo' nsagte wul i yi, ke pèn nke nu lem pànyàm, ke pèn nke njù sàm pagkèt jujù. (Lev. 17:10-14; Mfà'Gha 15:20). A ke' pe baggte nkàb i, ke pèn nke nsagte wul i z'a pe ndà-Nsi là, njam ndepà' ne fèle, ke ne fit lo, ke ne nu lo. A ke pèn nke nu bàngà, ke mfu kebwô lo, l'a nke njù jujù z'a ku'ni là. Ko' ntù i kañ ntù' tà' ndà tshà'te Nsi. Mbà zit ngelañ no, mbà ngelañ zit nu lo, a nke nèn ndà-Nsi, nju' ntshob Nsi, kà ke tag. A num nke nkô ne tshà'te Nsi ndà i, mbà ntùm tsham mbà ndùse tunndà i tse'te là, nummb'a lèn mbe mènkrìstô ke'ku'ni ne yôg ke tamte po Nsi mum tshà'te Nsi.

Ñwà'ni z'a ghà'là, pe à ñwà'ni Nsi z'a num nsiañ mbèn nke nzi'te njòñ lé'njù fa là, nke mfon zenu mbà neta, yôg, nkà' mbà fu' se sàm mèn ke'lèn nà, ntùm bwe. A kañ ntù'tà' lambo num nku mi mbà tà' ntobi z'a pe ndo' nde' ngakebàn ntsho yi là. A pà ze ju tanjòñ mbèn mbe jujù ywèt ne lo' nkém ntù i yi njòñ lé'njù fa, ntse ntùn z'a pe ntswe'te ntù i là, lagntse z'a pe nsôg wul i bwe là, tà' yentese z'a pe njen wul i bwe là.

A num nkô ne ket ze fantà'tù, nummb'a lèn ndùndotfen ke tse bwe, ke fantà'tù, nummb'a lèn ndù po Krìstô pam num vù ntùm yôg nswe là, a nke ndyag à tshu mfe tù, tshu ts'a pe ntswe matmat là, tshu tse myag ke' pe yen nà. (Pàkolosé 3:1-10). A nàpte wul i nenèn ntèt Nsi, mbèn mbe tà' tù se po ywit kañ ntse à nke njam ntàm nà, tà' kañtù s'a lat num tù ntùn nke njam ntàm mà yàm nà. (Yobkwi 1:1-3). Yen mèn ni ke' pèn ne bwôg vùkob nummbe Ywèt Nelàn z'a yàm ntshùate là mbà Nkôni Nsi z'a bwô myagte là dun mum ntù i.

## **SEVE MBATTE GHAM**

Yésu tshob ndù: "Tu wul àm me pà nelo num vù mbà yôg, Mèn z'a pam àm nà, a pe z'a kwù mbà ne kwù là, mb'a nsi yôge. Mbà we lo z'a tshwèt njôge, mbam àm nà ke nsi kwù yòñ ntshù'."





10. TSHO NTÙM NKUNI NGAYÔG O



(Yohané 11:25-26) — “Kwà’ nenùne, kwà’ nenùne, me tshob pin ndù: Mèn z’a num nju’ ntshob mà m mbam mèn z’a tum àm nà ghù yôg matmat; mbe ndù a ke pèn ne se’ mbwe netsho’te ntsha, là, a tum ntùm vù nèn ntùm yôg.” (Yohané 5:24). Vùkob ke’ pèn ne ghù mènkrìstô nke mbwôge mbèn nke mvètte. “Là, ngelañ ze yen wut nebaggte li nsi mà’ ze kebaggte, yen wut ne kwù li mà’ ze kekwù là, yen ngelañ nà, men ntshob li mi po kite là nsi pumte ndù: Netshùantsho lo mi vùkob! vùkob, yu netshùantsho yà? Vùkob njôñh o yà? Njôñh vù pà nukebwô, neta nukebwô pà ntshù’. Ghamte pe Nsi z’a fà netshùantsho pen njam Tshùaben pen Yésu Krìstô là.” (1 Pàkor 15:54-57).

Mèntùn z’a zin ku ntshù’ po Nsi là, ze po yi yôg shun nà, ke’ pe bwôg tse vùkob. Ndùse ze ngelañ ku’ là, a fùag wut ne nèn ndañdañ mbà Ngantum Nsi Paulô tshob là: “Me tshwèt nkù ntù ne tum nèn ntèt Krìstô, mbe pag yi, yen nà bwô ntshùàte.” (Pàfilipi 1:23).

Mènkrìstô pe nkù ntù ne yen Yésu se se. A num nkô ne yen mèn z’a nà’ nkwù num tu i num fantà’tù ndo’ njôg i yi là, neshu. Ywèt Nelàn nke mbèn nkwimte men ntshob Yésu li yi: “kà ntù tsin vètte; pin pam Nsi, mbèn mban mbà me, Dù’ntswè num ntùm ndà Tàà yàme ... Ngelañ me nsi nène, kà nàpte dù’là, me nsi pèn se’ lo’ zine, ndù dù’ze me pe bwe là, mbà pin pe zin bwe.” (Yohané 14:1-4).

“... A pà ju ze pag ke’ pe yen nà, ju ze tòn ke’ pe ju’ là, ju z’a ke’ ko’ ntùm ntù mènntùn nà, njôñ tshu fa tse Nsi nà’ nàpte num pen tse po num nkô i là.” (1 Pàkor 2:9).

Ko’ ntshob ke’ pe tse bwe, ne lo’ nsôn nkuni pàdù’ mfe kamànyam tse po nàpte num pen tse po pe num yen nsitshà’ li, nke nzin num mánze Tshùaben Yésu Krìstô là.

Dù z’a fe mbe ndù po à’ yen nka-mvôg (ndùlàlà mbe vùkob)

là, pag à pin tshwèt nke njen angèl z'a pe ngantum Nsi là, num sen seve li. A tshwèt nke mbéb ne lo' mènkebwò z'a kañ ntù i là, nèn mfà Nsi. Zwiag po Ywèle ké'te nkù tshob num wut z'a num nkwù là; po tshwèt nko' nèn mbañ Mèn z'a yàb ntù i num po, njòg num po, mbèn nkwù num po là. Nsi nàpte mat mb'a nsi lo' i yi, pèn tshob yi mb'a se' mebwò njam men ntshob Tshùaben i mbà Ngatswit'é li là: "A bwò me ngafà' mebwò, o pà mèn nenùne; mb'o pe mèn nenùn num pontsit tshu là, me nsi fañ tshu yàm wù, o ke ndé'é. Se' ntsho ntùm tsiañte tàan." (Matio 25:21). Satan ke' pèn ngù pàwà num i. "Vù pen tse po pe nkò Yawé là, tanjòn num myag Nsi." (Yobkwi 116:15). "Me ju' mo' nze tshob mfe kamànyam ndù: Kite! Ghafen pà fepenntùn tse po kwù num Tshùaben fe ndònni là. Ywèt tshob ndù: Ñ, po nsi fite num mfà' mube; nummbe mfà' mub tam njam po." (Apokalypse 14:13).

Wù z'o tshwèt nsiañ yen "yentese ntù mènntùn" ni là, a bwò ndù Nsi ywim't'o ndù o fà ntù o Mèn z'a num nkò o là, nummb'a tshwèt mbu' mbu wù ndònni nke ntshob ndù: "Nshum àm (Ngon àm), fà ntù o me." (Tànkùt 23:26). Fà ntù o z'a bot là Yésu, ntù o ze nu tshùà i là, ntù o z'a tshwèt nywin nà, a nsi fà ntù nswe mbà ywèt nswe wù. Kà fañ ntù o z'a pe ntatte là fùt'o, kà ke nju'ni yi nummbe: "Mèn z'a num njé'te num ko' ntù i là pà nkagni; là mèn z'a num ndo' à zenu nzin yi là nsi yòge." (Tànkùt 28:26). Kag nukebwò tsho nsi, njàb ntù num Nunetsine "nummbe nkàpfà' nukebwò pà vùkob, là ju kondèn Nsi pà yòg matmat njam Kristò Yésu Tshùaben pen." (Pàròmà 6:23).

Wù z'o fà yòg su Nsi là, tshùb ju z'o kwé njam pamntù là neta mbà nkòni z'a pe num Yésu-Kristò là, ntshùà njam Ntshob mi Paulò tshob ntùm ñwà'ni 2 Timotio 1:12 "Nummbe me lèn mèn ze me pam i là, ndèn kwà' mebwò ndù a pà mèn neta z'a ku'ni nelem pu' sàm num sen lé'njù là, là." Tshùb wul o pu o njam pamntù Nelàne, ntshà'te Nsi njam Ywèt Nelàne, ntsin num Nkòni Nsi, nte myag num Yésu z'a pe Mânze mbà Nenùne

mbà Yôg là, yi, Tshùaben pen z'a nsi pèn se' ndende ndyag tse pen nà — “Mfen Pàfenfen, Tshùaben pàtshùaben.”

“Ghamte pe mèn z'a ku'ni nebéb zin num njôn ne vù nsi fa, ngù pin tsin mbwe nkuni mi, kelo', ntùm tsiañte là; ghamte neghu' ze ndüb, neta, pàwà pe tà' Nsi ntshù' ngayôg pen njam Yésu Kristô Tshùaben pen, ghamte lo pe yi, ghamte num yi, ghamte nsi pe yi ngu'ngu'. Amèn.” (Yuda 24,25).

Copyright ANGP

**A SPECIAL WORD FROM ANGP**  
**UN MONDE SPÉCIAL DE L'ANGP**  
**UMA PALAVRA ESPECIAL DA ANGP**

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from [www.angp-hb.co.za](http://www.angp-hb.co.za) or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de [www.angp-hb.co.za](http://www.angp-hb.co.za) ou comme une Application "Heart of Man" sur téléphones Android.

Este livro "O Coracao do Homem" é obtido em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de [www.angp-hb.co.za](http://www.angp-hb.co.za) ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

**l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.**

**As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.**



**Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.**

**If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.**

**Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.**

**Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.**

**Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.**

**Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos**

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratuftamente a literatura evangelica, livros e folhetos em mais de 538 lnguas diferentes escreva para:

E-MAIL: [info@angp-hb.co.za](mailto:info@angp-hb.co.za)  
[info@angp.co.za](mailto:info@angp.co.za)

**ALL NATIONS GOSPEL PUBLISHERS**

**P.O. Box 2191**

**PRETORIA**

**0001**

**R.S.A.**

**A Gospel Literature Mission financed by donations**  
**Une Mission de litterature evangelique financee de dons**  
**Missao de literatura Evangelica financiada por donativos**

(Reg. No. 1961/001798/08)